



Sesida dals

15 d'avrigl 2025

Communitgà ils

16 d'avrigl 2025

Protocol nr.

289/2025

Dumonda Gort

concernent il project da pilot per professionalisar clubs gronds en il Grischun –
contribuziun a quint da la finanziaziun speziala Sport

Resposta da la Regenza

La Regenza ha approvà il project da pilot sa basond sin l'art. 6 al. 1 lit. g da la Lescha davart la promoziun dal sport e dal moviment (Lescha da promoziun dal sport; DG 470.000). Tenor questa disposiziun pon contribuziuns or da la finanziaziun speziala Sport vegnir concedidas a projects generals per promover il sport.

Igl è da menziunar, che tut las federaziuns ed uniuns da sport en il Grischun han la pussaivladad d'inoltrar ina dumonda via ils instruments da promoziun existents, independentamain dal fatg, sche quai porta in avantatg a l'organisaziun u betg. En il rom da l'instrument da promoziun «Projects» examinescha l'istanza da giudicament en spezial, sch'il project ha in character innovativ e vegn realisà supplementarmain a la lavur generala da l'uniun, sch'i vegnan iniziadas midadas u svilups, cun tge mesiras che las finamiras fixadas duain vegnir cuntanschidas, sche l'atgna finanziaziun è sufficienta e tge facturs che mussan il progress dal project. Fin al mument dal conclus da la Regenza n'ha nagina autra uniun inoltrà ina dumonda per in project cumparegliabel. Il project da pilot ch'è vegnì inoltrà dals dus clubs da la liga naziunala A d'uni-hockey, era ultra da quai fitg detaglià e praticamain madir per vegnir realisà.

Tar la dumonda 1: In eventual avantatg u dischavantatg da concorrenza pertutga la dumonda, sch'ils meds da promoziun han in effect direct u indirect sin il success sportiv. Directamain exista probablamain schizunt in dischavantatg da concorrenza per ils clubs existents Piranha Chur e Chur Unihockey: D'ina vart ston els numnadamain investir almain il medem import en il project (l'atgna finanziaziun n'è betg cuntegnida en il preventiv da sport operativ) – da l'autra vart sto la nova organisaziun

Floorball Chur United vegnir stabilida parallelamain al manaschi da campiunadi current. En cas d'in success ha il project da pilot consequenzas a vista mesauna per il svilup sportiv, pia previsiblamain il mument, sin il qual la Regenza prevesa da stgaffir in nov instrument da promoziun per ulteriuras uniuns grondas.

Tar la dumonda 2: Sco menziunà al cumenzament, è l'art. 6 da la Lescha da promoziun dal sport la basa per questa decisiun. Tenor l'art. 125 al. 1 da la Lescha federala davart gieus per daners (Lescha da gieus per daners, LGD; CS 935.51) dastgan ils chantuns utilisar ils gudogns nets da las lottarias e da las scumessas da sport mo per intents d'utilitad publica. Organisaziuns da sport commercialas èn pia exclusas.

Tar la dumonda 3: Ins sto considerar, ch'il project da pilot è resultà en consequenza da la fusiun da duas uniuns grondas. La contribuziun al project da pilot na po pia betg simplamain vegnir multiplitgada cun 8. Per survegnir ina tala contribuziun ston las autras uniuns grondas plinavant esser prontas da medemamain investir agens meds en projects cumparegliabels. La Regenza e la Cumissiun chantunala per promover il sport èn da l'avis, ch'ils meds disponibels en la finanziaziun speziala Sport sajan suffizients.

Tar la dumonda 4: Il project da pilot duai gidar a rimnar experientschas davart las dumondas, schebain, entaifer tge termin ed en tge dimensiun che las investiziuns en ina direcziun pli effizienta pudessan vegnir refinanziadas tras retgavs creschents. Las contribuziuns or da la finanziaziun speziala Sport èn adina da durada limitada.



En num da la Regenza

Il president:

Il chancelier:

Marcus Caduff

e.sub. C. Hartmann Lütscher